

## Presentade la 45<sup>e</sup> edizion de Fieste de Patrie dal Friûl

Lis celebracions a son in program, di gnûf in presince, intal Comun di Vît propit ai 3 di Avrîl, zornade de fondazion dal Stât patriarcjâl

Ai 3 di Avrîl dal 1077 al fo costituît il Stât patriarcjâl furlan. Propit ai 3 di Avrîl dal 2022, 945 agns plui tart, si celebrarà la 45<sup>e</sup> edizion de Fieste de Patrie dal Friûl. La cerimonie religjose e chê civil a son in program a Vît, Comun dal Friûl Ocidentâl pront a cjapâ sù il testimoni di Udin, che e à ospitât la manifestazion l'an passât.

Il program siôr di events de Fieste - organizade chest an dal Comun di Vît cu la poie de Regjon Friûl - Vignesie Julie e de ARLeF, in colaborazion cul Istitût Ladin Furlan "Pre Checo Placerean" - al è stât presentât ai 23 di Març inte sede di Udin de Regjon Friûl-VJ, cu la presince dal assessôr regjonâl aes autonomiis locâls, Pierpaolo Roberti, dal president de Agjenzie Regjonâl pe Lenghe Furlane, Eros Cisilino, dal sindic di Vît, Pietro Gerometta e dal president dal Istitût Ladin Furlan, Geremia Gomboso.

*«O vuei fâ notâ un sincronisim une vore significatîf - al à ricuardât il president **Cisilino** -. Chest an la zornade previodude pes celebracions e cole juste ai 3 di Avrîl. Nol capitave di timp. O feveli duncje di coincidence parcè che, biadelore, tal 2022 la Fieste e torne in presince e intal moment "canonic". Cun di fat o ricuardi che par vie de pandemie, tal 2020 lis celebracions a son stadis dome virtuâls, e l'an passât, pe stesse reson, o vin podût organizâ, in Avrîl, dome une cerimonie simboliche, posticipant a Setembar chê civil. Al è cun grant plasê, cun di plui, che chest an o larin intal Friûl Ocidentâl, a Vît, par celebrâ, in comunitât, i valôrs culturâi e linguistics che il popul furlan si ricognôs ogni di e che midiant di chescj al aferme la proprie identitât».*

*«O ringracii la ARLeF che, cul afidânus la organizazion de gnove edizion de Fieste, e à fat une scomesse. Par Vît e je une oportunitât straordenarie che in graciis di jê o crôt che o podarìn dimostrâ che ancje un piçul comun di mont al pues pontâ a ospitâ un event tant grant e impuartant - al à marcât entusiast, **Gerometta** -. Par me e je pardabon une felicitât grande ancje parcè che, di sindic, o consideri une vore impuartant cjapâ drenti inte tutele dal furlan, in particolâr, i plui zovins, cirint di trasmetiur i valôrs dal nestri popul e la Fieste e contribuîs ancje a chest, duncje il fat di podê ospitâle sul nestri teritori nus jemple di braùre».*

**IL PROGRAM DE ZORNADE** – Passant al program de zornade dai 3 di Avrîl, al è daurman evident un element che al caraterizarà la 45<sup>e</sup> edizion: lis celebracions no si fasaran intune stes localitât, ma in plui lûcs. Chest parcè che Vît al è un Comun cuntune carateristiche singolâr: tra San Francesc, la localitât plui a Nord, e Cjasiât, chê plui a Sud, a son bogns 20 kilometris. Lis celebracions, duncje, a scomençaran in vie Jacopo Ortis a

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

Vît (monument ai Muarts in vuere), aes 9, cu la esposizion de bandiere dal Friûl, un moment di solenitât che al sarâ acompagnât dal côr di Rigulât.

Po dopo, al partirà il corteu acompagnât dal grup di sbandieradôrs e tambûrs "Lupi Feritas" di Voleson bande la Glesie parochiâl di Vît, intitulade a Sant Michêl Arcagnul. Culi, aes 10, i trê rapresentants des diocesis furlanis (Gurize, Concuardie-Pordenon e Udin) a celebraran la Sante Messe in marilenghe, cun leturis e preieris ancje par sloven e par todesc e l'acompagnament dal côr di Rigulât.

A misdì, tal centri polifuzionâl di Cjasiât, si fasarà invezit la cerimonie civîl, che si vierzarà cu la leture de Bole dal Imperadôr Indri IV, e dopo di cheste, come simpri al sarâ fat il scambi de bandiere dal Friûl tra il sindic dal Comun di Udin, Pietro Fontanini, che al à ospitât la Fieste intal 2021, e il prin citadin di Vît, Pietro Gerometta. Po dopo e sarâ la proiezion video di une version inedite dal Imni dal Friûl. Al è un progjet realizât dal Istitût Ladin Furlan "Pre Checo Placerean", in colaborazion cu la ARLeF, dulà che il grup "Moments" al interprete une version moderne di "Incuintri al doman", nassude di une idee di Moreno Valentinuzzi. Tant che suaze dal Imni e de conte par imagjins - la regjie e je di Giorgio Milocco - a son lis viodudis maraveosis dal Biotop naturâl des Risultivis di Flambri e dal Mulin Braide. La cerimonie civîl e larâ indevant cui intervents des autoritâts.

Finît il gustâ, ospitât tal centri polifuzionâl di Cjasiât, il program, curât dal Eco Museu Lis Aganis, des 14.30 al previôt la pussibilitât di visitâ la mont di Anduins, dulà che al è il monument ae Mari dal Friûl; si podarâ ancje scuvierzi il cjistiel Ceconi, a Pielunc; i landris di Pradis; la Plêf di Sant Martin; o la antiche biblioteche storiche di bonsignôr Zannier, dulà che, pe ocasion, des 15, al sarâ presentât il libri di Walter Tomada "Storia del Friuli e dei Friulani". Cun di plui, inte serade prime des celebracions, ai 2 di Avrîl, tal centri polifuzionâl di Cjasiât, aes 20.30, dopo un intratigniment curt de "Associazione Musicâl e Culturâl Santa Margherita APS di Anduins", al è in program il spetacul realizât dai poetis dal Cjanâl dal Arzin "Rievocazione della nascita del Friuli".

Udin, ai 23 di Març dal 2022

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<